

擎桌凳同分菜尾

謝惠如

台灣早期个農業社會，鄉下若係有人做好事討心白抑係嫁妹仔時節，隔壁鄰舍同莊項人毋單淨會抽撥時間來搵手，還會將自家屋下个桌凳、碗筷、托盤、菜刀等等拿去借佢。食飽晝後係有伸菜腳，到臨暗頭大家愛食夜个該下，主家就會將菜腳爛好，一家一戶去發送。

該時節莊下人家做好事請人客都在屋家辦，無像今嘎个人攞分人包辦，無就去餐廳仔宴客。哪有像該下人，大部分都係靠隔壁鄰舍同附近个親朋好友來搵手。佢等對搭棚布到煮來食个筵席，將菜餚个舀碗捧送，還有收擎檢擎等事頭，攞規劃啊好勢好勢，毋使主人操煩。

一開始就會有人分撥事頭，婦人家將自家屋家个托盤、菜刀同砧板，碗筷都拿去，再搵手擇菜、切菜、煮食，男仔人就擎桌凳、擺桌凳、擲布棚，做裏做該尋事頭做。大家都分工合作蓋鬥搭，知麼人應該負責哪項事，任務分配啊相當好，也準時上菜，主人同賓客都盡歡喜。

宴席結束後還愛繼續搵手，假使桌席項還有伸菜，愛收集起來倒做共下，再放入大鑊肚爛煮，煮滾後再用錫桶裝好，由兩個身胚較高大的婦人家一前一後扛等，每家每戶去分送。那種合菜个香味遠遠就鼻得到，係莊下人家想望另一種味緒个佳餚，這就係頭擺个味緒「菜尾」、「菜腳」。這種菜尾緊煮緊好食，但係今嘎个喜事無菜尾吔，因

為無人敢食，驚怕有傳染病，衛生嘛毋好，故所今嘎已經無這種「菜尾、菜腳」个味緒咧。

頭擺个農業社會有交工个社群制度，不管係婚喪喜慶，抑係春耕秋收都會主動互相搵手，彌補勞力不足个問題，產業機械化後，生活習慣跔著改變，擎桌凳、交工這兜蓋有人情味个農家情景，已經失傳了。鄉下農家生活困苦，蓋少有大魚大肉好食，愛過年過節抑係喜宴場合正有機會食封雞封肉，故所該下个農民較惜福，雖然係食過个伸菜也無浪忒。